

ISLAM DAN KEBUDAYAAN MELAYU DI ERA GLOBALISASI DI MALAYSIA

Baharuddin bin H. Puteh dan Mohamad Nazli bin H. Omar

Kolej Universiti Islam Melaka

E-mail: *dr_baharudin@yahoo.com*

Abstrak:

Sejarah telah menunjukkan bahwa dunia Melayu-Islam merupakan pusat peradaban, pusat perkembangan budaya dan pusat perdagangan yang penting. Kebudayaan Melayu-Islam sejak ratusan tahun telah memperlihatkan kemampuannya untuk berkembang pesat merangkumi bahasa, kesusasteraan, kesenian, pemikiran, dan norma hidup. memang tidak dapat dinafikan bahwa fenomena globalisasi memberikan pengaruh kepada kehidupan umat Melayu-Islam. Namun, pengaruhnya lebih cenderung kepada negatif berbanding positif. Cuma ia bergantung kepada umat Islam untuk mendepaninya dengan berpegang kepada ajaran Islam yang sebenar dengan berpaksikan kepada al-Qur'an dan al-Hadits. Pegangan yang kukuh dan utuh terhadap dua sumber perundangan ini mampu menyelamatkan umat manusia khususnya umat Islam daripada terjerumus ke dalam kemungkaran yang tjidak dituntut dalam syariat Islam.

Kata kunci: Islam, Melayu, dan Malaysia

Pendahuluan

Pembahasan dan perbincangan tentang Islam di Malaysia selalu menarik minat para pengkaji dan peneliti tentang kedudukan Islam di Negara ini mengingat masyarakat umum sudah mengetahui bahwa Malaysia merupakan sebuah Negara Islam. Ia disebabkan kecenderungan mereka untuk melakukan penyelidikan ini karena struktur masyarakat Islam di Malaysia mempunyai kedinamisan dan keistimewaan tersendiri. Ada juga yang melontarkan pendapat bahwa di antara Islam dan Melayu tidak dapat dipisahkan, malahan terangkum dalam Pelembagaan Malaysia yang menyebut dengan jelas

tentang bangsa Melayu dan kekuatan Islam tersebut sebagai agama persekutuan.

Skenario di Malaysia, antara Islam dan bangsa Melayu mempunyai ikatan yang erat. Ini dibuktikan oleh banyak sarjana dan tokoh-tokoh akademik yang telah menyelidiki serta menganalisis tentang penghayatan dan pelaksanaan hukum-hukum Islam dalam kebudayaan masyarakat Melayu. Menurut Rahimin Affandi (2005) bahwa proses pembangunan kekuatan agama Islam di Malaysia bukan dimulai sejak kemerdekaan pada 1957, tetapi ia sudah terbangun sejak sekian lama, yaitu semenjak Islam bertapak di Tanah Melayu.

Ia dikukuhkan lagi pada masa kini dengan merujuk kepada Pelembagaan Persekutuan Malaysia dalam Pasal 160 yang menyentuh dengan jelas tentang tiga elemen utama untuk bangsa Melayu, yaitu perlu beragama Islam, bertutur dalam bahasa Melayu, dan mengamalkan adat istiadat Melayu merujuk kepada kebudayaan (Muhammad Fauzi Asmuni, 2011). Keterikatan antara tiga komponen ini telah membentuk satu identitas yang kuat dan jitu sehingga mampu memperkuat jati diri Melayu yang sudah terbentuk sejak lama. Oleh yang demikian, tulisan ini akan mengupas dan membincangkan kaitan Islam dan bangsa Melayu serta kedudukannya di era globalisasi di Malaysia.

Hubungan Islam dan Melayu

Lipatan sejarah telah merekam bahwa sebelum datangnya bangsa Eropa yang menjajah kawasan ini, masyarakat di Nusantara, khususnya alam Melayu telah mempunyai tamadun dan kebudayaannya yang cemerlang (Zainal Kling, 2005). Walaupun begitu, kecemerlangan tersebut sebelum kedatangan Islam tidak mempunyai dasar dan asas perpaduan dan jati diri yang tiada bedanya dengan tamadun lain sehingga datangnya Islam yang telah membawa bersamanya asas jati diri untuk diaplikasi dalam kehidupan umat

Melayu sehingga kini (Ahmad Munawar Ismail, et. Al., 2012).

Rahimin Affandi (2005) menggariskan beberapa faktor berhubung kecenderungan bangsa Melayu di Malaysia memilih Islam sebagai asas pegangan kehidupan mereka. Secara mudahnya ia adalah karena kesucian dan kesempurnaan ajaran Islam itu sendiri yang dapat dijelaskan dengan beberapa sebab, yaitu:

1. Ajaran Islam amat bersesuaian dengan psikologi dan mentalitas masyarakat Melayu yang mengamalkan cara hidup yang lemah lembut dan bersifat universal (menghormati keharmonisan alam).
2. Sifat ajaran Islam yang mudah dipahami, rasional, dan sesuai dengan fitrah manusia dibandingkan agama lain.
3. Cakupan agama Islam yang bersifat perkauman yang terbatas kepada sesuatu bangsa semata-mata, tetapi merangkumi kesemua bangsa manusia sedunia yang dibangun atas asas persaudaraan (ukhuwah). Asas persaudaraan ini tidak menerima sebarang pembagian kasta manusia yang mengakui semua manusia adalah sama martabat dan derajatnya di sisi Allah.

Ia diperkukuhkan lagi dengan pandangan yang dikemukakan oleh seorang sarjana kebudayaan Melayu-Islam, yaitu Syed Muhammad Naquib al-Attas yang mengatakan bahwa ajaran Islam telah memperkenalkan umat Melayu kepada budaya dan disiplin ilmu yang sebenar dengan mengenyahkan paham takhayul dan mitos. Selain itu, Islam juga yang telah memperkenalkan dunia Melayu kepada dunia Timur dan Barat sehingga bangsa Melayu menempa serta membangun kesultanan yang cukup masyhur dalam sejarah (Ahmad Munawar Ismail, et.al., 2012).

Selain daripada itu juga bahwa penerimaan masyarakat Islam di Tanah Melayu ini disebabkan tertariknya mereka kepada kelengkapan dan keindahan Islam itu sendiri yang menjadi umat yang lebih baik berbanding dengan agama lain. Ini diperkukuhkan dengan pandangan Khurshid Ahmad (1981) yang menjelaskan beberapa perkara utama dalam membincangkan kesyumulan dan keindahan Islam itu sendiri. Di antaranya ialah:

1. Cara hidup Islam yang sempurna.
2. Kesejagatan dan kemanusiaan.
3. Mudah, rasional, dan praktis.
4. Perpaduan antara material dan rohani.

5. Keseimbangan antara individu dan masyarakat.
6. Mengandung unsur tetap dan berubah.
7. Ajaran yang terpelihara.

Keistimewaan dan kesyumulan Islam ini dapat dirungkai serta dikaji menerusi peraturan dan hukum yang telah digariskan oleh Allah swt dan diaplikasikan mengikut sunah dan hadits Rasulullah saw. Menerusi penggubalan hukum tersebut, ia dapat membantu manusia untuk menjalani kehidupan beragama selain menunaikan keperluan sehari-hari yang lebih teratur, sistematik, dan beretika. Secara mudahnya manusia amat memerlukan agama dan pegangan. Dalam kata yang mudah manusia memerlukan pendidikan Islam dan bimbingan akhlak agar mereka dapat membentuk sifat kemanusiaan serta memainkan peranan mereka yang dilantik oleh Allah swt sebagai khalifah di atas muka bumi ini. Sekiranya mereka tidak memiliki pendidikan dan bimbingan akhlak mengikut jalur Islam, mereka akan terdedah kepada perkara-perkara yang keji dan terkutuk seperti dengki, iri hati, zalim, dan sifat tercela lainnya. Lantas ini akan memberikan pengaruh yang mendalam dalam kehidupan manusia. Tantangan umat Islam kini seperti penyalahgunaan narkoba, pembuangan bayi, murtad, dan pembunuhan memerlukan perhatian yang

serius. Tambahan pula bangsa Melayu memiliki adat kebudayaannya yang baik, seperti sopan santun, lemah lembut, menghormati orang tua, dan lain-lain sedikit sebanyak tercalar dengan pengikisan nilai agama ini. Oleh karena itu, akhlak yang muncul dari acuan agama Islam yang padu ini dapat membentuk jati diri yang utuh dan mapan dalam jiwa masyarakat Melayu. Hanya Islam saja yang mampu memandu manusia ke jalan yang sebenar buat sekalian manusia. Firman Allah

يَهْدِي بِهِ اللَّهُ مَنِ اتَّبَعَ رِضْوَانَهُ سُبُلَ السَّلَامِ
وَيُخْرِجُهُم مِّنَ الظُّلُمَاتِ إِلَى النُّورِ بِإِذْنِهِ
وَيَهْدِيهِمْ إِلَى صِرَاطٍ مُسْتَقِيمٍ

artinya: Dengan (al-Quran) itu Allah menunjukkan jalan-jalan keselamatan serta kesejahteraan kepada sesiapa Yang mengikut keredaanNya, dan (dengannya) Tuhan keluarkan mereka dari gelap-gulita (kufur) kepada cahaya (iman) yang terang-benderang, Dengan izinNya; dan (dengannya juga) Tuhan menunjukkan mereka ke jalan yang lurus (QS. al-Maidah: 16).

Pembentukan Jati Diri Kebudayaan Melayu-Islam yang Dinamis

Firman Allah,

يَا أَيُّهَا الَّذِينَ ءَامَنُوا ادْخُلُوا فِي السِّلْمِ كَآفَّةً
وَلَا تَتَّبِعُوا خُطُوَاتِ الشَّيْطَانِ إِنَّهُ لَكُمْ عَدُوٌّ

مُّبِينٌ

artinya: “Wahai orang-orang Yang beriman! masuklah kamu ke dalam agama Islam (dengan mematuhi) Segala hukum-hukumnya; dan janganlah kamu menurut jejak langkah Syaitan; Sesungguhnya Syaitan itu musuh bagi kamu yang nyata (QS. al-Baqarah : 208).

Ayat ini jelas menunjukkan tentang peranan Islam dalam memandu hidup manusia dalam berbagai aspek kehidupan. Individu dan masyarakat bertamadun perlu menjurus kepada masyarakat yang menjalani kehidupan yang berpaksi kepada dasar-dasar Islam selain dapat membina kebudayaan dan ketamadunan bangsa yang diberkati. Bagi merealisasikan hasrat ini, kekuatan pembinaan jati diri dalam kebudayaan Melayu-Islam ini amat bergantung kepada kemantapan aqidah dan mengamalkan ajaran Islam dengan sebaik mungkin. Dalam memperkuat pembinaan jati diri kebudayaan Melayu-Islam ini, selayaknya perlu diterapkan dengan pengukuhan menurut al-Quran dan al-Sunnah di samping beberapa elemen lain:

1. Kekuatan untuk membela dan mempertahankan hak untuk kehidupan yang baik.
2. Kekuatan aqidah bagi melahirkan pengetahuan manusia yang jelas dan paham tentang keperluan keimanan bagi melahirkan budi pekerti yang baik.
3. Kekuatan ilmu pengetahuan karena ia mampu mendorong manusia untuk mencapai kebahagiaan dunia dan akhirat.
4. Kekuatan akhlak sebagai proses pembentukan budi pekerti yang mulia.
5. Kekuatan ikatan sosial yang berperan untuk menolong masyarakat dalam menegakkan dasar-dasar Islam bertujuan untuk kebahagiaan umat Islam.
6. Kemantapan perdamaian berkaitan pelaksanaan perpaduan dalam masyarakat.
7. Kekuatan ekonomi dalam mencari kekayaan dan kemajuan untuk dijana dan digunakan secara adil dan bijaksana (Abu Bakar, 1976).

Berdasarkan elemen-elemen di atas, ia dapat memberi gambaran tentang perlunya kekuatan agama, yaitu Islam dalam memperkuat nilai-nilai kemanusiaan, khususnya dalam

kebudayaan dan peradaban yang perlu ditunjang oleh kemantapan aqidah, syariah, dan akhlak.

Peranan Islam dalam Kebudayaan Melayu

Dunia Melayu-Islam sebenarnya mempunyai sejarah gemilang sebelum datangnya penjajah Barat di rantau ini. Sejarah telah menunjukkan bahwa dunia Melayu-Islam merupakan pusat peradaban, pusat perkembangan budaya dan pusat perdagangan yang penting (Fariza Md. Sham, 2002). Kebudayaan Melayu-Islam sejak ratusan tahun telah memperlihatkan kemampuannya untuk berkembang pesat merangkumi bahasa, kesusasteraan, kesenian, pemikiran, dan norma hidup.

Dalam membincangkan tentang kegemilangan tamadun dan budaya Melayu, yang menjadi persoalan yang sering dibahas ialah siapakah yang layak memainkan peranan untuk mengangkat marwah dan derajat Melayu sehingga menjadi masyhur dan terkenal. Jawabannya ialah Islam yang menjadi pegangan dilihat sebagai faktor utama yang memainkan peranan dalam memperkuat bangsa Melayu beserta kebudayaannya.

Dalam meluaskan perbincangan tentang perkara ini, penulis akan mengupas

kebudayaan ini dari aspek kesenian sebagai asas. Tamadun dan peradaban Islam telah mempengaruhi bidang kesenian Melayu, baik dari segi ukiran, seni bangunan, dan seni hias. Contohnya dalam pembangunan masjid, pengaruh seni bangunan masjid dari Asia Barat telah mempengaruhi reka bentuk masjid di alam Melayu. Ia dapat dizahirkan berdasarkan bentuk kubah dan bentuk mihrab yang menghadap kiblat.

Peranan Islam dalam kebudayaan Melayu ini diperkukuhkan lagi dengan pengaruh seni lagu dan musik yang dikembangkan oleh panyair-penyair Islam untuk menggantikan seni lagu dan musik pra Islam. Media seni lagu dan musik ini telah digunakan oleh para pendakwah untuk mengembangkan agama Islam. Di Malaysia, seni lagu dan musik bercorak dakwah dikenal sebagai nasyid dan qasidah (Fariza Md. Sham, 2002).

Oleh yang demikian, dapatlah dirumuskan bahwa agama Islam ke alam Melayu merupakan satu zaman transformasi kepada umat Melayu yang asalnya dalam kegelapan kepada cahaya. Selama ini, umat Melayu dibelenggu dengan paham dan pegangan yang bergantung kepada mitos dan khayalan, namun Islam telah mempengaruhi dan mencorakkannya untuk kesejahteraan ummah.

Tantangan Kebudayaan Melayu-Islam di Era Globalisasi

Globalisasi bukan sekedar slogan, tetapi ia adalah perancangan strategik dunia Barat bagaimana menjadikan masyarakat non Barat, khususnya orang-orang Islam sebagai sasaran penjajahan bentuk baru. Kekuatan langit terbuka yang menghasilkan teknologi komunikasi dan telekomunikasi serta penguasaan sistem keuangan dan ekonomi di bawah sistem keuangan internasional (IMF), Bank Dunia, Persatuan Perdagangan Dunia (WTO) adalah contoh bagaimana Barat sedang mengatur langkah yang amat agresif supaya konsep dunia tanpa sempadan dapat dicapai dan akhirnya proses pembaratan dapat terjadi dalam semua aspek kehidupan. Inilah tantangan terbesar yang sedang dihadapi oleh umat Islam karena secara jangka panjang umat Islam menghadapi gugatan dan ancaman yang luar biasa (Sidek Baba, 2010).

Dalam hal sedemikian, Malaysia tidak dapat mengelak untuk maju dan berkembang. Sebagian daripada tuntutan untuk maju dan berkembang mampu memberi pengaruh dalam jati diri dan integritas umat Islam, khususnya dalam bersaing dengan dunia Barat yang dilihat maju dan modern kehidupannya. Oleh karena itu, amat perlu pemikiran ulang

dibuat, strategi baru dibangunkan dan pendekatan bijaksana diatur supaya Islam sebagai agama yang pernah menempa nama dalam pembinaan tamadun manusia mampu menjuarai kembali dalam arus perubahan dunia yang semakin hilang pedoman dan arahnya. Justru kekuatan aqidah, iman, kualitas diri yang dibangun berasaskan keteguhan ilmu yang sepadu, berjiwa merdeka, kepentingan keadilan dan moral harus menjadi orientasi dalam proses pendidikan dan pembangunan ummah (Sidek Baba, 2010).

Dalam membicarakan beberapa tantangan globalisasi terhadap kebudayaan Melayu-Islam di Malaysia, dinyatakan beberapa tantangan yang perlu diberi perhatian khusus. Di antaranya:

1. Ancaman keutuhan kebudayaan Melayu.

Beberapa perkembangan yang dapat dilihat di sini ialah ancaman yang menggugat keutuhan kebudayaan Melayu-Islam yang berpaksikan globalisasi. Sebagai contoh, dampak negatif yang dibawa oleh paham liberalisme yang memberi pengaruh kepada pemahaman Islam di Malaysia. Dapat dilihat dari sebagian pendukung paham ini yang mencoba menyebarkannya dalam kehidupan beragama, khususnya agama Islam

sehingga ia mampu memberi pengaruh yang besar kepada *survival* umat Islam itu sendiri.

2. Penghinaan terhadap peribadi Rasulullah dan ulama' muktabar.

Masyarakat Melayu-Islam di Malaysia memnag terkenal sensitif dengan isu kerasulan Rasulullah saw. Namun, sejak belakangan ini lahirnya satu usaha dan gerakan yang mengendaki agar peribadi Rasulullah dipermainkan dan dipertikaikan. Terdapat tindakan yang secara terang-terangan menghina peribadi Rasulullah yang digambarkan sebagai insan yang mempunyai kecenderungan nafsu yang tinggi melalui perkawinan Rasulullah saw. (Farish A. Noor, 2000). Perkara ini timbul hasil dari pengaruh globalisasi yang sedang melanda umat Islam di seluruh dunia.

3. Merebaknya Paham Liberalisme.

Gerakan liberalisme yang didukung oleh *Sister in Islam* (SIS) dan Forum Iqra'/Jemaah al-Qur'an Malaysia dilihat memainkan peranan yang penting dalam penularan paham liberalisme ini. Buktinya apabila SIS dan JAM ini dilihat menonjol dalam menyokong pembentukan Suruhanjaya Antara Agama (IFC) yang diseminarkan pada 24 Februari 2005 (Anis Shakila Ismail,

2006). IFC didirikan berdasarkan Majlis Peguam Malaysia yang disokong oleh Majlis Perundangan Malaysia bagi ajaran Buddha, Kristen, Hindu, dan Sikh (MCCBCHS) yang dilihat mencampuri kedaulatan agama Islam yang menjadi teras kepada agama Persekutuan Malaysia. Pembentukan IRC ini dilihat mampu memberi impak yang negatif kepada kelangsungan agama Islam yang mana ia berpunca daripada pengaruh globalisasi kini.

Berdasarkan ancaman-ancaman di atas sebenarnya ia akan menjadi masalah dan mampu merusakkan kesyumulan dan keindahan Islam terhadap kebudayaan Melayu-Islam yang sudah terbina sekian lama di Malaysia. Namun, desakan dan rempuhan kuat dari pengaruh globalisasi ia telah mencorakkan pola kehidupan yang beragam.

Kesimpulan

Secara asasnya, memang tidak dapat dinafikan bahwa fenomena globalisasi memberikan pengaruh kepada kehidupan umat Melayu-Islam. Namun, pengaruhnya lebih cenderung kepada negatif berbanding positif. Cuma ia bergantung kepada umat Islam untuk mendepaninya dengan

berpegang kepada ajaran Islam yang sebenar dengan berpaksikan kepada al-Qur'an dan al-Hadits. Pegangan yang kukuh dan utuh terhadap dua sumber perundangan ini mampu menyelamatkan umat manusia khususnya umat Islam daripada terjerumus ke dalam kemungkaran yang tjidak dituntut dalam syariat Islam.

Daftar Kepustakaan

Al-Quran al-Karim.

Abu Bakar H. (1976). *Syarah Falsafah Islam*. Kota Bharu: Pustaka Aman Press.

Ahmad Munawar Ismail, et.al. (2012). "Islam Dan Pembentukan Jati Diri Bangsa Melayu". *Jurnal Hadhari Special Edition (143-154)*.

Anis Shakila Ismail. (2006). "Pemikiran Islam Liberal di Malaysia: Kajian Terhadap Isu Yang Ditimbulkan oleh Farish A. Noor dan Syed Akhbar Ali", (Latihan Ilmiah Sarjana Muda Usuluddin, Akademi Pengajian Islam, Universiti Malaya, tidak diterbitkan).

Farish A. Noor. (2000). "Let Islam Lead The Way with Its Progressive View In Sexuality," dalam *News Straits Times*, 4 November 2000.

Fariza Md. Sham. (2002). "Peranan Islam Dalam Sejarah dan Kebudayaan Melayu." dalam *Dakwah Kepada Masyarakat Muslim Di Malaysia*. Bangi: Jabatan Pengajian Dakwah dan Kepimpinan UKM.

Khursid Ahmad. (1981). *Islam: Prinsip Dasar dan Karakteristiknya*

(*terjemahan*). Bandung:
Perpustakaan Salman.

Muhammad Fauzi Asmuni. (2011).
“Perjuangan Bangsa Melayu Dalam
Mempertahankan Jati Diri Dan
Agama Islam,” dalam *Konvensyen
Memperingati Kejatuhan Empayar
Melayu Islam Melaka*. Melaka:
Universiti Teknikal Malaysia
Melaka.

Rahimin Affandi. (2005). Citra Islam
dalam Pembentukan Manusia Melayu
Moden Di Malaysia: Satu Analisa”,
Jurnal Pengajian Melayu Jilid 15.

Sidek Baba. (2010). “Memahami Konsep
Penguasaan Ilmu Pengetahuan,”
dalam *Ke Arah Umat Hadhari*. Kuala
Lumpur: Yayasan Ilmuwan.

Zainal Kling. (2005). *Islam di Malaysia*.
Kuala Lumpur: Gapeniaga Sdn. Bhd.